

BIOGRAFIJA

Husein-ef. Kavazović je porijeklom iz ulemanske familije Kavazovića, koja je tokom historije dala veliki broj uglednih imama i hafiza muslimanima u Bosni i Hercegovini.

Rođen je 3. jula 1964. godine u Jelovče Selu (općina Gradačac), od oca Hasana i majke Saime, kao jedno od osmero njihove djece. Osnovno obrazovanje stekao je u rodnom mjestu, a Gazi Husrev-begovu medresu u Sarajevu je završio 1983. godine. Godine 1985. upisao se na Šerijatski fakultet na poznatom univerzitetu Al-Azhar u Kairu. Studiranje je okončao 1990. godine. Magistarski rad je odbranio na Fakultetu islamskih nauka u Sarajevu iz područja šerijatskog prava. Stručne i druge radove je objavljivao u listovima i časopisima koje izdaje Islamska zajednica u BiH, a učestvovao je i u radu redakcija i uredničkih savjeta nekih od njih.

U radni angažman u Islamskoj zajednici u BiH uključen je 1985. godine kao imam, hatib i mualim u džematu Gornji Srebrenik. Po okončanju studija radio je na području Medžlisa IZ-e Gradačac. Za muftiju tuzlanskog imenovan je 1992. godine. Na toj dužnosti je i danas.

U strukturama Islamske zajednice u BiH je obavljao više dužnosti, na koje je biran ili postavljan. U Sabor IZ-e u RBiH izabran je prije same Agresije na Bosnu i Hercegovinu. Od konstituiranja Obnoviteljskog sabora biran je za člana Rijasetu IZ-e u BiH u svim mandatima. Član je Vijeća za fetve IZ-e u BiH. U više mandata obavljao je dužnost predsjednika je Školskog odbora Behram-begove medrese.

Aktivno je učestvovao u pripremama za odbranu i u samoj odbrani Bosne i Hercegovine od Agresije, u jedinicama Patriotske lige BiH i Armije Republike Bosne i Hercegovine. Od komandanta ARBiH odlikovan je za ispoljenu hrabrost i zalaganje u odbrani. U toku Agresije na BiH je s najodgovornijim ljudima IZ-e u BiH i bošnjačkim intelektualcima iz Tuzle i drugih gradova radio na obnovi i radu Tuzlanskog muftijstva i Behram-begove medrese, na uvođenju vjeronauke u osnovne i srednje škole, te obnavljanju lista Hikmet. Taj period je obilježio i uporednim radom na humanitarnom polju, snažno se angažirajući na zbrinjavanju prognanog i izbjeglog stanovništva iz Istočne Bosne.

Od potpisivanja Dejtonskog mirovnog sporazuma 1995. godine svoje i napore Muftijstva tuzlanskog je ulagao u obnavljanje infrastrukture IZ-e u BiH i povratku muslimana u sela i gradove iz kojih su protjerani. Tako je obnovljen rad struktura Islamske zajednice u BiH u gradovima Odžak, Modriča, Bosanski Šamac, Brčko, Bijeljina, Janja, Zvornik, Vlasenica, Bratunac i Srebrenica. Pored toga, organizirao je stalno pružanje pomoći povratnicima, u saradnji s humanitarnim i drugim organizacijama.

Od početka procesa identifikacije žrtava Genocida u Srebrenici konsultiran je od strane ICPM-a i udruženja žrtava o vjerskim pitanjima, i u izgradnji Mezarja i Memorijalnog centra u Potočarima. Član je i predsjednik Savjetodavne radne grupe, čiji je zadatak da definiira sadržaje u izradi projektne dokumentacije za kompleks Memorijalnog centra u Potočarima.

Svojim autoritetom i angažmanom je doprinio izgradnji zgrade Biblioteke Behram-beg u Tuzli, osiguravši joj i status javne ustanove od posebnog značaja za Tuzlanski kanton. Jedan je od pokretača Centra

za rehabilitaciju ovisnika o psihoaktivnim supstancama u Smolućoj kod Lukavca, prve ustanove za rehabilitaciju ovisnika u okviru Islamske zajednice u BiH. I ta ustanova je proglašena ustanovom od posebnog značaja za Tuzlanski kanton. Zajedno sa svojim saradnicima radio je na pokretanju i razvoju Agencije za certificiranje halal kvalitete IZ-e u BiH. S ljudima iz medžlisa u Srebrenici, Zvorniku, Modriči i Bosanskoim Šamcu, inicirao je i realizirao projekte izgradnje vakufskih objekata i upravnih sjedišta medžlisa. Tako su ti medžlisi dobili svoja sjedišta po prvi puta. Aktivno je učestvovao u obnovi i izgradnji više od sedamdeset džamija na područjima Bosanskog Podrinja i Posavine.

U saradnji s muslimanskim dobrotvornim društvom Merhamet inicirao je akciju prikupljanja kurbanskog mesa za rad Narodne kuhinje Imaret u Tuzli. Ova akcija traje nekoliko godina i njome se osiguravaju godišnje potrebe ove kuhinje za mesom za preko tri hiljade korisnika. Pored toga, pružio je snažnu podršku radu ženske organizacije Sumejja i izdavanju njenog časopisa, kao i radu drugih udruženja iz Tuzle i Bosanskog Podrinja.

Nakon studijskog boravka na Cornell univerzitetu u SAD-u, pokretač je Tuzlanskog ljetnjeg instituta, koji se realizira u saradnji toga univerziteta i Behram-begove medrese. Programi učenja engleskog jezika, informatičkih tehnologija i poduzetništva četiri godine zaredom okupljaju stotine mladih ljudi, a podučavaju ih profesori najprestižnijih univerziteta u svijetu. Inicijator je i seminara za nastavnike i profesore engleskog jezika, koji se realizira u saradnji s Ambasdom SAD-a u Sarajevu, Ministarstvom obrazovanja, nauke, kulture i sporta Tuzlanskog kantona, Behram-begovom medresom i Pedagoškim zavodom Tuzlanskog kantona, tri godine zaredom, a na kojem su predavači ugledni profesori s američkih univerziteta.

Učestvovao je u radu međunarodnih islamskih konferencija i naučnih skupova u Istanbulu, Meki, Kairu, Rabatu, Teheranu, Kuvajtu i Džakarti, kao i na naučnim skupovima u Bosni i Hercegovini.

Govori arapski jezik i služi se engleskim jezikom.

Supruga Fatima i dvije starije kćerke Saima i Kadira su završile medresu, a najmlađa Emina je od ove školske godine učenica Behrambegove medrese u Tuzli.